

Era istòria der Antic Molí

Nòm:

Grop:

Trabalh, constància e superacion son es ingredients mès preciosi deth chèf Vicent Guimerà.

Darrèr deth restaurant Antic Molí d'Ulldecona, Tarragona, i é Vicent Guimerà, propietari e chèf, qu'en 2016 siguec nomenat Codinèr der An de Catalonha pera Vanguardia e eth Fòrum Gastronomic. Eth madeish an eth sòn restaurant recebec ua estela Michelin, ua distincion que sonque se da as milhors restaurants deth mon. Er an 2017 renovèc era estela.

Eth camin tà arribar ath reconeishment deth sòn trabalh comence ans endarrèr quan Vicent viu en casa eth mestièr de codinèr. Es sòns pair-sénhers auien agut un restaurant e es pairs tanben. Vicent ajudaue a sa mair en restaurant en gèsser dera escòla.

Rebrembe que non ère bon estudiant e un dia sa mama li didec que s'ac aprovaue tot anarie tà Cambrils tà estudiar codina. Era motivacion siguec tan grana qu'ac arthenec e se n'anèc tara escòla d'Ostaleria de Cambrils.

- Jamés auia trèt tan bones nòtes! -ditz Vicent-, hèja çò que m'apassione: era codina.

En acabar es estudis hec practiques en diferenti restaurants entà aquerir experiéncia e apréner a portar un negòci. Siguec ath costat deth chèf Jean Luc Figueres, qui l'ensenhec un pialèr, e de Nandu Jubany. Tanben trabalhèc damb es pairs en restaurant El Faro de Vinaròs.

Damb 24 ans Vicent decidic, gràcies ara ajuda economica des pairs, dirigir eth sòn pròpi negòci: l'Antic Molí, un establiment que ja existie e auie estat de d'auti propietaris sense guaire succès. Mès eth nau Antic Molí anèc guanhant-se era confiança des clients damb eth bon trabalh deth dia a dia e eth boca-aurelha. Atau transcorreren es primèrs ans deth restaurant.

Dètz ans mès tard, e frut dera evolucion personau e professionau, Vicent reestructurèc eth restaurant e creèc es minjadors gastronomic. En aguesti espacis eth comensau pòt experimentar e gaudir des emocions que li desvelhe era sua codina. Ath delà, aufrís un menú diari e era celebracion d'eveniments e banquetes. Arren de tot açò serie possible sense era equipa de 12 persones joenes, entre codinèrs e crambèrs, der Antic Molí, ua equipa ben formada e unida qu'eth chèf Vicent lidèr e supervise.

Era sua codina ei de proximitat e tradicionau, mès ath madeish temps li agrade combinar sabors de cultures diferentes. Er an 2016 arrecebec ua reconeishença deth movement Slow Food Km 0 per usatge de productes deth territòri e ecologics.

Damb cada ua des sues elaboracions vò transmèter eth plaser de minjar, de forma qu'es clients visquen ua experiéncia deliciosa entàs sentits e siguen satisfèti.

Vicent tanben ei coneishut coma eth "xef de la galera", pr'amor que des de 2008 er Antic Molí organize eth Galera Tour, que son ues jornades annaus dedicades ad aguest crustaci autoctòn, damb er objectiu de reivindicar-ne era valor ena codina.





Enquia hè pòc era galera non ère guaire apreciada gastronamicament maugrat qu'era sua carn ei gustosa. En Antic Molí s'a especializat en recèptes que l'an coma protagonista dempús dera prepausa d'un client a Vicent tà que codinèsse era galera.

Era equipa der Antic Molí trabalhen tà superar-se cada dia e ara gaudissen d'a on son ara e de çò qu'an arrenhut. Afronten eth futur damb illusion e nauvi rèptes que les permeten créisher e continuar en tot aufrir ua autentica experiéncia gastronamica.

Se vòs mès informacion sus er Antic Molí, consulta era plana web: <https://www.anticmoli.com/es/>

VOCABULARI E EXPRESSIONS

Boca-aurelha: Transmission o difusion orau d'ua noícia, ua informacion, etc., dirèctaments d'ua persona a ua auta.

Gastronomic: Relatiu o pertanhent ara gastronomia.

Gastronomia: Coneishença de tot çò qu'a a veir damb era codina, era elaboracion e era composicion des plats, e er art de degustar e apreciar es minjars e es begudes.

Motivacion: Accion de motivar.

Motivar: Dar (a quauquarrés) motius que l'estimulen tà hèr ua causa.

Slow food: Minjar lent. Minjar damb atencion, en especiau en tot avalorar era qualitat e en tot tier en compde era procedéncia des matèries prumères e era manèra de codinar-les. (Hònt: Revista Muy interesante)

Galera: Crustacèu dera orde des estomatopòdes, dera familha des esquillids, qu'a uns 20 cm de longitud, d'un color auriolenc e de còs deprimet.

Distincion: Prerrogativa, aonor, etc., concedit a quauquarrés tà recompensar eth merit.

SINONIMS

Liderar: Dirigir, amiar.

Autoctòn: Naturau, originari.

1 AUEM CURIOSITAT

1. En quines activitats ajudes as pairs en casa, e as frairs e as pair-sénhers? Quina t'agrade mès? Perqué?

.....

2. Qué ei un producte ecologic?

.....

3. Quines cres que son es valors qu'a d'auer ua equipa tà que sigue amassa e eth resultat deth sòn trabalh sigue excellent?

.....

4. Era galera ei un crustacèu. Coneishes eth nòm de d'auti crustacèus?

.....